

Pickswart glinsternd

VAN LUISE BÖÖK UT
DUNUM

„Wenn Jelko doch blot disse verflixte Idee to de Kopp ut smieten dee! Villicht kummt he bi Verstand, wenn he en Bruud hett!“, dat harr Gisela mennigmaal docht. Man dat weer nich mitlopen. Sien Mareike harr de sülvige Kruller in de Kopp as he.

Egentlik weer Gisela ja heel krodd up hör Jung. He harr studeert un weer nu Derendoktor. Van mörgens bit avends un mennigmaal miden in de Nacht weer he ünnerwegens, weer to Stee, wenn



LUISE
BÖÖK

daar en Peerd en Kollik harr, wenn daar en Koh de Schuum för de Snuu stunn, wenn dat Schaap sük de Blass freten harr of wenn en Kater kastereert worden muss. Peerd, Koh, Schaap of Kater, man ok, Panther un Jaguar. Wenn de Derendoktors in de Zoo dichtbi daar nich tegen överhauen kunnen, repen se bi Jelko an. Wat weren daar för wunnerbaar Deren. Tigers un Löwen, Panthers un en Jaguar, en pickswarten. Wenn Jelko de seeg, verloor he sük in sien Gedachten, sien Drööm. „Irgendwennehr krieg ik een!“, dat harr he sük in de Kopp sett.

Waar he de rechtschapien ünnerbringen kann, wuss he noch nich. In de Stuuvtominnst nich, so as Blacky. Blacky weer hör toloper, en Kater, ok pickswart. Noch keem hüm de heel Leevde togood. Jeden Mörgen, wenn se ut 't Huus gungen, striekeln un strakeln se hüm, un avends leeg he bi de beiden up 't Sofa to snurren. „Hörst du dat, Mareike, nett as en Jaguar. De is blot en Spier luder!“ He striekelde dat wunnerbaar glinsternde Fell van de swarte Kater. Mareike un he verloren sük in de sülvige Drööm. „Ji sünd mall!“, dat seen de Lüü, un villicht harren de ok Recht.

Upstünns sleep de Drööm ok in hör Achterkoppen. Se wullen heiraden, dat stunn nu an de eerste Stee. Daar harr Gi-

sela up lurrt, un wenn dat ok noch so verrückt weer, se wull hör eenzigst Jung to de Hochtied sien Drööm wahr maken. Dat droog se al lang mit sükrüm. Se harr sük alltied düchtig beknapp un Geld bi de Sied leggt, un en heel Bült över en Jaguar leest, wu he pleegt wurr un wat he bruken dee. Egentlik bruuk se dat heel nich weten. Jelko un Mareike gung dat wat an. Se verstunn dat ohnhen nich. Wat wullen de mit en Jaguar? Kunnen de beiden nich en anner Hobby hebben? Reisen of Breevmarken sammeln? Nee, en Jaguar!

Good, se sullen hör Will hebben. Gisela doch an hör Keerl sien Wörter: „Geiht nich, giff nich!“ Siet he dood weer, reep se sük disse Spröök fakentieds up, un mennigmaal

hulp de. Se weer daar fix achterto, hör Will in Doon ümto-setten. Un lesterhand kreeg se wükelk Togang to en Jaguar un sien Pleger! Weer so as in Jelko sien Drööm, kommodig snurrend, elegant un pickswart glinsternd. Gisela hör Drööm weer dat wiss nich, man dat muss ok ja nich. Bi de Pleger kann he sien Ünnerkummst hollen, man köfft harr se hüm. Wat för en Geschenk!

Ennelk Hochtied. Dat Fest weer organiseert, de Antog un dat wunnerbaar Bruudkleed lurren up hör Uptree. As dat Bruudpaar so fein utstaffeert ut 't Huus keem, stunn in de Dammstee en Jaguar, elegant un pickswart glinsternd, de Dören inladend in Hängen open!